

摘藻堂四庫全書薈要

史部

欽定四庫全書薈要

史部

硃批諭旨卷二百十三之六

詳校官編修臣繆晉

欽定四庫全書薈要卷八千一百九十九

吏部

硃批諭旨卷二百十三之六

硃批邁柱奏摺

雍正十二年二月初四日湖廣總督臣邁柱謹

奏為奏明事本年正月二十三日准署寧遠大將軍

查郎阿咨開湖廣征兵所需衣帽靴鞋及軍前應
需旗幟帳房鑼鍋銅罐茶葉等項希照冊開件數
轉飭原營速為製備解送軍營應用至於騎馱馬

鞍弓箭撒袋鋤鋤鐵斧馬掌馬絆水火皮袋火繩等項在於陝省代辦其所費銀兩楚省運解還項等因臣思各兵袍掛長短鞦鞋大小應令本家製辦方得適體合宜但每家約需銀五兩恐一時湊費不及未免稽遲行令各營向附近府州借支庫銀每家借給銀五兩及早辦備所借之銀於應領月餉內陸續扣還原項至於旗幟帳房鑼鍋銅罐之類各營現有存貯先為調齊同各兵衣帽鞦鞋

委員運送軍營以資征防其冊載茶葉三千四百一十斤所費無多捐買解給至馱載腳價銀兩議動三分耗羨項內支用俟委官運送回日將用過腳價核實年底彙冊達部所有臣現辦軍需之處理合繕摺

奏明伏祈

睿鑒謹

奏

查郎阿既自軍營移文索取非前次無因可比自當隨
宜料理照咨應付

同日又

奏竊臣回奏永州鎮衡州協各員缺將崔起潛等題
署摺內奉有

硃批命臣訪察容美司逃匪臣隨即密札按察使王柔

荊州道姜邵湘欽遵訪察外查容美司所用漢人
三教九流無所不有臣委王柔等辦理善後事宜

先經面諭又檄飭務須密查漢姦旗逃逐一解究
并派弁兵把守各關隘嚴加盤詰毋得縱脫現據
該司道文報有田旻如之門客術士劉璽劉安太
趙打虎胡道人并續獲閹人十名一併解省此外
有無匪類逃人尚在查拏等因又本年正月初四
日有容美土民向應時張宏謨唐本裔等赴臣衙
門首報田旻如養一還俗和尚吳金枝配以妻氏
圖謀不軌等因臣當將向應時等押發藩臬密訊

據向應時供稱雍正九年田旻如差人接一荆門
州道人趙打虎燒丹這吳金枝先是和尚跟趙打
虎進土司他說是吳逆的孫子是駙馬吳應熊的
兒子當時吳應熊逃在山海關外鼎護府沒耳躲
王招贅為婿生他的年紀纔三十多歲如今蓄髮
改姓陳現有妻子在土司他隨身帶著一幅布布
上寫有曲曲灣灣的字說是記兵數的番字去年
九月田土官叫小的同吳金枝往山東淮安調兵

又叫土民唐本裔跟隨服伺小的沒奈何只得同行走到襄陽樊城這張宏謨趕來說是田土官差他往京上求寬限摺子私自與小的說叫小的伴著吳金枝先到淮安等他上了摺子他來淮安會同小的哄誘吳金枝轉到武昌出首相約定了小的同吳金枝先到淮安沒有一人與他認識他開口問范公旦總無人曉得他還要到山東青州去小的不肯同他去到冬月二十四日張宏謨趕到

淮安湖嘴遇著小的們同誘吳金枝轉來十二月
二十一日船到漢口不料吳金枝上岸出恭就逃
走了小的們尋覓十多日并無踪跡只得呈明等
語訊據張宏謨唐本裔供同查燒丹道人趙打虎
已在容美挈獲脫逃之吳金枝現在飭差幹役賞
給路費分途密緝務獲審究外臣思吳金枝不過

山東

一無賴遊僧混進土司偽認吳逆之孫假稱山東
淮安有兵之語雖屬荒唐同黨匪類安保其無此
淮安有兵諒田旻如亦知假局借此唬嚇土目虛

事寧

容疎畧吳金枝不獲斷乎不可

張聲勢情或有之俟拏獲吳金枝到案自當嚴審

若如

此瞻前慮後則凡一切匪盜案件皆不便深究矣

究擬倘金枝妄報詭名及混扳無辜之人似不便

宜汝

并齒遲暮志氣漸就衰頹耶是何言歟

概行查提致滋拖累也是否有當伏候

皇上訓示遵行又據宜都縣呈稱上年十月二十四日

此請

更為可笑之談矣

有容美土目自京齎回奏摺不便令其前進謹將

御批原摺齎送到臣理合恭繳統祈

睿鑒謹

奏

覽

雍正十二年四月十六日湖廣總督臣邁柱謹

奏為請

旨事竊照湖北糧道武宏彥押運赴淮行至揚州病故

經撫臣德齡會疏

題報在案查糧道一缺有綜核通省糧儲督理漕運

重務必得才守兼優之員方能勝任臣於北南知

府中詳加揀選有湖南永順府知府袁承寵年力

精壯潔己率屬才猷練達在永五載事事調劑有
方屬吏苗民咸深愛戴請以袁承寵補授湖北督
糧道洵為得人如蒙

皇上俞允則永順府缺係新設府治尤為緊要查辰州
府知府李珣素悉苗情操守謹飭請以李珣調補
永順府知府實屬相宜所遺辰州府缺亦屬苗邊
查有永綏同知永泰居官強幹才具優長請以永
泰補授辰州府知府足資彈壓所遺永綏同知員

缺查有永順府通判梁璨謹飭勤慎熟諳苗情業
經湖南署撫臣鍾保會疏

題補沅州知州現在候

旨但沅州久屬內地永綏係新闢苗疆請以梁璨補授
永綏同知更屬有益所遺沅州員缺界連黔省又
屬苗疆例應揀補查有茶陵州知州朱琰辦事勤
敏才堪肆應以之調補沅州知州可收實效至茶
陵州係腹內中缺應歸部選臣因地方人材起見

不揣冒昧繕摺具

奏是否可行伏乞

皇上睿裁謹

奏

湖北糧道等員缺照所請行有旨諭部矣

雍正十二年五月十五日湖廣總督臣邁柱謹

奏為恭報楚省二麥豐收分數米糧價值仰慰

睿懷事竊照楚省上年布種二麥較前更廣今俱獲豐

收行據湖北布政使李世倬湖南布政使張璨將
收成分數及米糧價值分晰開報前來經臣體察
與兩司開報相符謹另單臚列具

奏恭慰

聖懷現今雨暘調順即菜豆之類均獲豐收早禾茂盛
晚禾青蔥雖江浙官糴商販陸續搬運四百餘萬
之多而二麥登場米價平減閭閻共慶盈寧遐邇
均霑

聖澤理合一併奏

聞

詳覽所開二麥收成分數并米糧價值朕心曷勝欣慰

同日又

奏雍正十二年四月二十八日接大學士臣鄂爾泰

張廷玉字寄到臣內開欽奉

上諭洞庭湖舵算洲建築石臺一事地方有司果有玩
視工程怠忽從事官員著臣據實嚴叅毋得姑容欽

此_臣查近湖十二縣去秋領帑雇募人夫船隻勤
敏幫辦者固多間有二三處不能如期雇到或解
不及數者_臣以該令等或才具平常或一時夫船
缺少或胥役奉行不善以致未能如期齊全_臣與
湖南前撫_臣趙宏恩已嚴檄誡飭并檄行總理衡
永郴道_臣許登瀛就近查察如有玩視令其詳叅
茲值湖水漸長對洲取土之河堤水已漫過在臺
運土夫船均已發回止留運砌石工夫船在臺辦

理俟秋時水退仍於對洲河堤取土甚近且土堅
如石填築臺心自可趕辦以冀來歲告竣倘屆期
仍有解到夫船不敷應用玩現怠忽之員臣立即
據實嚴叅斷不姑容有誤

欽工謹

奏

此工當極加留心督催辦理從前未免懈怠以致蹉跎
至今未竣耳

同日又

奏為欽奉

上諭事雍正十二年五月初四日臣接准部咨內閣鈔
出奉

上諭苗民年來遵奉法紀各安生業已屬可嘉今有民
間女子迷失路徑誤入苗寨而該苗龍有等不敢容
留即報明汎弁傳信招認又令伊妻伴宿措置合理
尤為罕覲著臣等傳

旨宣諭再加賞賚俾衆苗相率為善同受國恩特諭欽
此臣即欽遵行令湖南布政司從優賞賚俾霑
皇上格外洪恩并令廣宣

諭旨以示獎勵羣苗至意辦理外臣查前據辰永靖道

王葉滋稟報臣隨捐銀十兩令該道多備花紅羊

酒令地方官用鼓吹導送該苗寨并照設立族正
之例給以寨正委牌俾其訓導羣苗又據湖南布
政使張璨按察使胡瀛詳報賞給銀十兩在案理

合一併陳明臣謹

奏

賞以勸善辦理可嘉

雍正十二年七月初八日湖廣總督臣邁柱謹

奏為恭報早稻收成分數米糧價值仰慰

聖懷事竊照楚省二麥豐收臣已具摺奏

聞今早稻又豐熟收穫經臣行據湖北布政使李世倬

湖南布政使張璨將收成分數及米糧價值分晰

開報前來

臣

訪查無異以通省計之十分九分者

居多祇緣自春徂夏雨水調勻川水又小隄塍穩

固是以北南山田湖地及苗疆邊徼遍處豐收現

今中禾俱吐穗灌漿晚禾亦芄芄茂盛遐邇民苗

共慶盈寧僉謂數十年難逢之樂歲

臣

思江浙商

販已運米五百餘萬石目下楚省米價尚屬均平

誠恐民間不知撙節易於奢侈現在勸諭百姓省

費減用愛惜米穀多積多藏永享昇平

臣

同僚屬

遇此豐年愈加敬畏仰副我

皇上念切民依感召

上蒼默佑之至意所有收成分數米糧時價臣謹另單臚

列具

奏恭慰

聖懷謹

奏

覽早稻收穫分數慶慰之懷莫可言喻

同日又

奏為恭繳

御批奏摺事竊臣覆奏舩桿洲工程一事奉有

硃批伏查建築湖心石臺迺我

皇上普渡商客利濟萬世之至計凡屬臣工具有天良

敢不竭力趕辦臣計每年水長停工時飭令豫為

鑿石造船并備一切工料水退興工時飭令總理

分委各員及時趕辦未敢少懈今凜遵

訓旨益當留心督催辦理以期

欽工速竣至十五土司叨蒙

聖恩准予改流莫不歡呼拜舞俟部文到日設立文武
員弁建築城署塘汛一切善後事宜酌量辦理另
疏

題報外所有原摺并另摺奉到

硃批理合一併恭繳伏祈

睿鑒謹

奏

覽

一切善後事宜題到有旨

同日又

奏為遵

旨回奏事本年六月初一日准巡察臣歸宣光咨為奏
聞事內開永綏地方周圍不過三百餘里將來即盡行
開墾產米亦屬無多兵民俱往辰常等處糴買米

穀輓運背負而至一遇陰雨連旬灘河水漲山路險滑米糧不接甚為惶惶仰懇

敕諭督臣撫臣於藩庫公項內撥給銀二千兩交與永綏同知採買運貯以備平糶歲以為常再查永綏城內及附近水次之花園高巖俱有倉廩無庸另建等因接奉

硃批言之督撫二臣令其籌酌欽此移咨到臣臣欽遵諭旨查永綏係新闢苗疆產米無多誠應豫籌積貯是

以雍正十年九月內陞任湖南撫臣趙宏恩會同
臣邁柱酌議兵丁月米令辰州府經由花園高巖
南北兩路河道辦運在於吉多排補美花園米糯
四處建倉收支各汛兵糧外又念各兵餘丁眷口
及文武衙門人役以及民苗人等值青黃不接搬
運維艱之時未免米價高昂臣等又議令永綏城
內與夫花園二處各建倉十間各貯穀三千石以
備附近兵苗借糴之需俟城工官署修竣之日另

動公項建造買貯業於謹陳六里善後事宜案內
題准部覆在案是巡察歸宣光所奏臣於前題疏內
已經詳議及之矣至所稱倉廩無庸另建者乃指
運貯兵丁月米之米倉而非豫備積貯借糶之穀
倉也今查城垣衙署漸次可竣而永綏城內與夫
花園二處現在督令一面建倉一面遵照原議動
用公項值茲年豐穀賤乘時買貯以符原題穀數
於兵苗永有裨益所有巡察歸宣光原奏毋庸另

議為此謹

奏覆

旨臣謹

奏

業經辦理何庸再議所奏是

雍正十二年九月十五日湖廣總督臣邁柱謹

奏為恭報中晚二禾收成分數米糧價值仰慰

聖懷事竊照楚省早禾遍地豐收臣已查明具

奏今中晚二禾愈加豐稔臣行據湖北布政使李世

倬湖南布政使張璨各查明分數竝米糧時價分

晰開報前來與臣訪察相符謹另單開列恭呈

御覽自七月以來雨暘調順堤塍穩固高低田畝一應

黍稷麻豆襍糧俱獲豐收閭閻倉箱稱慶共樂熙

皞竝據湖南辰州府屬溆浦縣呈齎瑞穀一箱有

一莖二穗三穗者秀實穎粟洵稱嘉禾此皆我

皇上敬

天勤民至誠感召致太和翔洽垂為

盛世休徵理合一併奏

聞恭慰

睿懷謹

奏

民間俗諺湖廣熟天下足豐收如是實慰朕懷但當愈
加寅畏以敬承

天貺不可稍涉縱肆

同日又

奏為請

旨事竊照楚省收捐貢監事例原額北南各捐穀一百二十萬石湖北收捐過九萬餘石湖南收捐過一萬六千五百餘石尚未收捐二百二十九萬三千石有零雍正十一十二兩年因江浙等省米貴用濟民食并各案買補倉穀甚多臣請暫停收捐在案今荷

皇上宏恩全楚慶年來未有之豐稔自應仍請收捐以符原額但楚省議捐穀石原為常平倉積貯可裕兼為隣省緩急之需今查隣省俱嫌倉穀貯久色變連年委員赴楚向產米地方自行採買不需倉穀似不必代為豫備至於楚省常平倉北南貯穀一百一十四萬三千餘石又北南社倉貯穀四十五萬四千餘石本年收成豐熟社倉易於輸納臣出示勸諭聽民自便輿情愈加踴躍將來社倉積

穀倍多有備無患

臣愚以為

楚省常平等倉現今

俱屬充裕隣省又無赴倉買運若將應行流通之

穀多積於不待用之地似非隨時制宜之道況戶

部暨雲貴廣西甘肅江浙等省皆因軍需海塘急

務現有收捐事例更當酌量緩急俾願捐貢監者

赴戶部雲貴等處捐收折色以濟急需所有楚省

收捐貢監事例似無庸照額捐足應請徑行停止

是否有當伏乞

皇上睿鑒施行謹

奏

徑行停止是當之至具疏題請可也

同日又

奏為遵

旨議覆事本年五月十一日准原任湖北撫臣德齡鈔
錄摺奏內稱武昌省城漢陽門一帶江岸日就傾
圯請將本省收捐監穀事例改收折色三十萬石

修築江岸等因奉

硃批與邁柱再加妥議題請欽此臣查湖北省城漢陽

門沿江用石壘砌原有正護二岸現今正岸鞏固
惟臨江護岸向有埝坍之處然所坍石條緊護正
岸臣在楚數載每見伏秋水發於江岸無復加損
及水落石現形跡依然如舊非必不可緩之事若
行估修必先採備石條而現在建築舵桿洲石臺
工程浩大需石甚多北南兩湖雇募石匠開採每

年採取之石僅敷舩楫洲之用此時亦無石料匠
作可以分修江岸臣看漢陽門江岸情形即越十
年之後量加補砌猶未為晚所有前撫臣德齡原
奏無庸置議為此具

奏覆

旨臣謹

奏

不急之務自應從緩所奏是

同日又

奏為土司嚮化歸誠仰祈

睿鑒事本年八月初八日據湖南九谿協副將李椅詳稱據上崗長官司向玉衡下崗長官司向梁玉呈稱職等年來實難彈壓土衆久欲呈請改土祇因從前下崗司土司向鼎晟懇請歸流未蒙

皇上俞允是以不敢冒瀆今聞湖北忠崗等十五土司得遂所請不但職等仰邀倣例而土民望風嚮化

之念較職等尤為激切為此披肝瀝膽納土投誠
伏乞曲體輿情轉請題達又於八月二十二日據
岳常澧道孫元永定營都司僉書郭從虎各詳稱
據茅岡土司覃純一呈稱卑司久欲呈請改流以
免漢土有襍前因下崗土司向鼎晟不准改土遷
延至今茲土衆聞湖北忠崗等土司俱蒙

皇土恩予歸流土民得遂其所卑司土衆不肯自甘化
外卑司亦難照舊管束為此瀝陳下悃納土歸流

籲懇轉詳題請各等情前來除批令查明該土司等版圖戶口並該土司各本身田地頃畝數目詳覆到日核

題外臣查各處土民深受土司殘虐急欲歸流而不
可得今蒙我

皇上恩威並用教養兼至如悖逆土弁田畧如畏罪自
縊忠崗等十五土司默化潛消宜乎上下洞暨茅
岡各土司情詞懇切悉願改土且土衆觀感嚮化

歸流念切自應俯順輿情歸入內地俾得共沐

皇仁所有上下崗及茅岡各土司呈請歸流緣由理合
繕摺

奏明伏祈

皇上訓示遵行謹

奏

據奏上下崗暨茅岡各土司自願改土歸流具題到日
候朕另有諭旨

湖廣總督臣邁柱署理湖北巡撫臣楊嗣謹

奏為遵

旨回奏事據湖北布政使李世倬鈔錄條奏為敬陳管
見事一摺奉

硃批言之督撫欽此臣等遵查李世倬陳奏四條一屯
糧宜令州縣協徵一禁止私築垸堤二條現在行
查酌量辦理其請嚴遏糴併酌停糴一條查米石
一項自應聽商販運況屢奉

敕諭各省無敢遏糴至民間出糴已於湖北按察使王柔條奏為敬陳通裕民食等事案內會議

題明現候部覆李世倬所奏遏糴停糴之處毋庸置議又奏稱各營長支銀兩仍請隨扣隨抵以免混淆一條緣鎮筵鎮總兵官楊凱奏稱營中截曠銀兩即名長支請隔季扣除部議嗣後離省寫遠各營俱照鎮筵鎮所請之例隔季銷算扣除等因奉旨依議通行欽遵今該司李世倬以雍正十年定例離

省六百里以外之營應領餉米兩季兼發存貯文
員庫內按月支放其長支俸餉等銀即應照數扣
除若改照隔季銷算之例於餉銀無益轉致延壓
等語臣等正在酌議間又據李世倬會同湖南布
政使張璨詳稱湖廣北南各標鎮協營官兵俸餉
經各營每於月前季初請領回營迨後官有陞遷
事故兵有逃汰降拔自有截曠銀兩應解司庫歸
還項款查歷來截曠銀兩按月按季扣除委無拖

延壓捺之弊惟兩季兼領之營分春季甫中即請
夏秋二餉秋季甫中即請冬春二餉實以兩季為
一季若照鎮筵鎮之例再隔一季竟是一年一扣
為期甚遠實屬拖延難免弊混請嗣後截曠銀兩
除按月按季請領者仍按月按季除還外其兩季
竝領之各營領餉回營定例存貯文員庫內按月
給發應扣截曠銀兩似應飭令各府州縣按月扣
存具文報司各該營亦按季造冊通報仍將應扣

數目載入下季文領內送司以便按數扣抵竝令
各府州縣即將上季扣存截曠銀兩發與湊給如
請餉時止支放過四五箇月亦將此一季有零之
月分內所貯截曠銀兩一併冊報流抵兵餉如此
則兩季兼領之營亦無隔季不清之餉等因通詳
前來臣等覆加查核該司等議詳甚屬妥協隨批
令移行遵照竝咨明戶部兵部在案但楚省如此
辦理已杜侵那延掄之弊其直隸各省兩季兼領

之營若照鎮算鎮所請之例隔一季銷算扣除竟
是一年一扣為期甚遠是名為除弊其實轉滋弊
混有關餉項非淺理合一併陳明伏祈

皇上睿鑒施行

臣等謹

奏

事關軍營俸餉如應題明具疏題奏以聞

雍正十二年九月二十八日湖廣總督

臣邁柱謹

奏為欽奉

上諭事雍正十二年九月二十八日接准大學士鄂爾泰張廷玉字寄雍正十二年九月十三日奉

上諭湖南湖北副將內著總督邁柱將能勝楚省總兵之任者密舉一二員奏聞欽此等因寄信到臣臣

查楚省副將內有永順協副將王進昌才技出眾

邊疆事務實力辦理調度有方堪寄重任又衡州

協副將崔起潛

中平才具

操守謹飭曉暢營務現今署理永

州鎮總兵印務

恐未必然

訓練嚴明正己率屬且此二員年

力精健任楚已久熟悉風土均可勝楚省總兵之
任謹遵

旨密摺奏

聞伏候

聖裁謹

奏

母椿齡乃朕記名上等之員保舉一等內既未開列今
茲密奏復未言及其居官或有不妥協處否

雍正十二年十一月初一日湖廣總督臣邁柱署

理湖南巡撫臣鍾保謹

奏為遵

旨回奏事雍正十一年十二月十九日據鎮筵鎮總兵
楊凱咨稱奏摺內開鎮筵城外原有溪河一道發
源烏巢河直抵瀘溪縣其中有三四十里或生根
大石或無根大石橫斜阻塞船不能通約得工價
銀七千兩便可開鑿等因陳奏奉

硃批言之該督撫汝等會商妥計如果意見相同僉謂可行一面辦理一面奏聞欽此咨呈到臣臣欽奉

諭旨查雍正十一年九月先據辰永靖道王葉滋通詳請開鑿此河今復據該鎮楊凱咨呈摺奏同屬一事行令布政使張璨詳委岳常澧道孫元親赴彼地會勘去後今據張璨詳據孫元移稱會勘鎮算原有溪河二道一在城東南由石羊哨至兩江口達辰谿縣大河現今麻陽荔溪等船往來可通一

在城東北由算城至河溪口達瀘溪縣河上下俱
通柴船惟中間烏鰲至媽鰲三十餘里巖石阻塞
不通舟楫即今鎮算總兵楊凱奏請開鑿之處也
查河身亦覺寬濶誠恐疏鑿之後水勢甚急易於
乾涸且河中橫巖巨石以及魚梁車壩蓄水之處
甚多雖礙行舟然水勢賴以停蓄故算城雖在萬
山之中現今小舟尚可往來一經疏鑿水勢迅疾
無阻恐源流有限直瀉無餘難保其長流不息且

近河悉係民田皆設天然水車就水勢衝激流轉以資灌溉疏鑿之後河身低下車運不及轉致有妨田畝不便開鑿等因詳覆前來臣等覆查鎮寧城外原有溪河二道一在城之東南直達辰谿縣河一在城之東北直達瀘溪縣河今鎮臣楊凱奏請開鑿東北溪河之處河源發於西南高阜東下陡急近河悉屬莊田安設天然水車以資灌溉河中橫巖巨石水勢賴以停蓄一經疏鑿直瀉無

阻不特無濟舟行轉致有妨田畝所有總兵楊凱
原奏無庸置議為此具

奏覆

旨臣等謹

奏

所議是朕意亦謂不宜開鑿

湖廣總督臣邁柱謹

奏為欽奉

上諭事雍正十二年五月二十九日准大學士鄂爾泰
張廷玉字寄雍正十二年五月十四日奉

上諭湖廣容美土司素稱富饒兼以田舜年田旻如父
子濟惡苛虐貪婪廣有蓄積此衆人所共知者今田
旻如畏罪自盡所有貲產財物絲毫不必入官清查
此案之官員亦不可絲毫染指著一一登記明白將
彼地能曉大義聞風向化之長官土民詳悉查明分
別等次通行賞賚再田旻如之子弟親屬俟審結後

若有應給安插之費亦將此項賞給爾等可即傳諭
邁柱知之欽此遵

旨寄信前來等因到臣竊臣任楚之始即聞容美土司
強橫富饒行同王侯遂留心細加體察方知田旻
如庸懦無能一味苛虐土衆虛博富饒之名臣因
其僭妄暴戾屢負

聖恩怙終不悛是以列款糾叅迨旻如畏罪自縊之後
隨即委前按察使王柔會同荊州道姜邵湘進司

辦理善後事宜一面清查旻如財產不許絲毫隱匿旋據該司道轉委安陸府署通判毛峻德枝江縣知縣傅琛造具現存衣飾馬騾等物并被土衆搶失物件冊各一本前來臣查冊內家產寥寥無幾并無金銀厚貲先被土人搶散衣馬等物該土人陸續自行繳還訊據旻如之子弟田琨如等僉供祖上原屬富饒明季遭流賊賀搖旂搶擄貲財一無所有迨後田舜年漸立家業又被長子田炳

如承襲浪費至田畧如雖橫徵濫派每年花費過多實無銀錢積蓄等語臣恐猶有隱藏情弊尚在確查俟查明另報至清查家產各員無敢絲毫染指再田畧如連年整備拒敵官兵種種謀為不軌業經審明按謀叛已行擬斬所有財產入官妻子應給功臣之家為奴經臣照律審斷具題在案茲奉

上諭臣仰體

皇上格外宏恩請將旻如父子田園仍入官外其餘衣飾等物賞給旻如妻子似屬情法兼至再土人歸化之初非比內地百姓咸知

國法若遽以財物賞賚恐不能遍及而受賞者未免矜能肆志將來難以約束查容美土司每年額解秋折糧銀九十六兩請以雍正十二年起至雍正丙辰年底蠲免錢糧三年則土衆普被

皇仁咸知感激但一切賞賚出自

聖恩臣未敢擅便所奉

密旨亦不敢繕入審案俟內部將審案核議

題覆之日統祈

欽定遵行謹繕摺覆

旨臣謹

奏

具題到日朕另有諭旨

雍正十二年十二月初四日湖廣總督臣邁柱謹

奏為恭請

聖裁事竊照湖北臬司員缺奉

旨著河南管河道白映棠補授欽此臣查湖北刑名事

件倍多於湖南必須歷練老成之員方於通省官

民有益以新授北臬白映棠較之湖南按察使胡

瀛則胡瀛固已任久熟諳且臬司大吏為屬員之

表率而白映棠由武昌府知府陞轉離湖北未久

各府知府直隸知州多係舊同寅即白映棠不敢

重朋情而輕公務誠恐各府州恃有向日寅誼不
無怠玩所關甚鉅以臣愚見莫若將白映棠與胡
瀛北南調用一轉移間匪特白映棠可以避嫌而
人地亦各相宜矣是否可行伏祈

睿裁謹

奏

白映棠與胡瀛互調之奏是有旨諭部矣

同日又

奏為請

旨事竊照因公叅處之州縣官疊荷

恩綸著該督撫將其居官如何出具考語送部引

見其有人材可用而逾格加恩遷擢者不計其數臣仰

體

皇上愛惜人材之至意於因公叅處之屬員中靡不留
心體察茲查原任鍾祥縣知縣王世經先於叅革
安陸府知府陳齊登案內被勒出銀革職留任又

因該縣姦民張東周等聚衆抗糧部議將王世經革任在案又有原任寧遠縣知縣蔣德重因拏獲盜犯覃日鼎覃萬三寄監越獄脫逃二叅限滿不獲部議降三級調用仍留地方協緝嗣查覃日鼎等於越獄之後即被徭人奉禮太等打死無犯可緝竝非承緝不力經湖南署撫臣鍾保將蔣德重降調之案咨請開復准部覆以該犯被徭人打死竝非該員協同緝獲應將所請蔣德重開復之處

無庸議在案臣查王世經謹飭自持有志奮勉將德重熟悉苗疆努力向上此二員皆屬有用之才較之初入仕途之人實屬諳練今俱因公累誤殊為可惜倘蒙

聖主格外加恩准將王世經蔣德重交臣於新闢土司仍以知縣委用俟三年無過地方整理准其實授則該員等自當努力任事益圖報效矣可否伏乞皇上睿鑒批示遵行謹

奏

諭部將該員等檄調來京引見後有旨

同日又

奏雍正十二年十月初十日接准鑾儀衛咨為欽奉
上諭事內開雍正十二年九月二十日奉

旨從前兵部將漢整儀尉楊景達帶領引見都司缺看
楊景達騎射平常且人甚庸懦狡詐未必能勝任爾
等密寄信與總督邁柱留心將楊景達試看倘騎射

仍舊平常不急公效力行走著叅奏欽此密咨到臣

又本年十一月二十日准兵部咨為報明患病等
事內開據湖廣蘄州營都司楊景達家人楊義呈
稱竊身主楊景達偶患寒症現在延醫調治不能
即為赴任等因應准其調理俟病痊即行起程赴
任知照到臣准此查蘄州營都司一官有兵馬錢
糧之責且濱臨大江接壤豫省本地匪類資其巡
緝私販豫硝入境責令查拏實屬要缺茲新補都

司楊景達已奉

上諭騎射平常似難訓練弁兵又庸懦狡詐必不嚴督
巡防況楊景達現今患病不能赴任要缺未便久
懸仰祈

皇上另補一員

命速來楚或容臣於能勝都司之任者揀選

題補如楊景達已經出京前來俟有另缺酌量委署
試看可否伏乞

聖裁臣謹

奏

有旨諭部矣

雍正十三年二月初十日湖廣總督臣邁柱謹

奏為奏

聞事據荊州府江陵縣詳報縣屬虎渡地方於正月初
十十五等日有民人歛錢聚集各帶鋤筐堵築官
河口稱保護田疇當即拏獲首犯熊明如等十九

名餘犯俱即散去其堵築之河挖濬疏通商賈往

來如舊等情臣查虎渡河直達湖南常德又分洩

川江水勢歸入洞庭湖北河一經堵築舟楫不通

商賈裹足且江汎水漲無處分洩勢必氾濫橫行

荆江下游之監石潛沔各州縣民命田廬恐難保

全今愚民無知以為築河可衛田疇殊不知為害

隣封甚鉅臣隨出示明白曉諭并行布按二司究

明築河實情重處外理合備將情由奏

聞謹

奏

此皆平時忽畧未經預行曉諭之所致覽奏知道了

雍正十三年三月二十四日湖廣總督臣邁柱謹

奏為奏

聞事竊照湖北襄鄖等府州開墾一案臣欽奉

諭旨委員實心查勘并勸導民人盡力開墾務使地無

遺利以副我

皇上愛養生民之至意今據布政使李世倬襄鄖道魯
之裕開報各州縣報過首墾勸墾田地襄陽府屬
一萬五千九百九十二頃零鄖陽府屬六千七十
五頃零直隸歸州屬一千九百八十四頃零計報
墾田地共二百四十萬五千一百八十畝零內鄖
西房縣保康三縣業已勸墾足額其餘州縣現在
源源續報除俟各屬報墾復額一併繕冊恭疏
題報外謹將湖北府州開墾成效先行具摺奏

聞伏祈

睿鑒謹

奏

田疇日闢地無遺利善政也但須據實查報勿致勉強從事

同日又

奏為奏

聞事本年二月二十一日據辰州府分防永綏同知梁

璨詳稱准永綏協副將張崔移會內開正月十五日有一人名劉獻祥口稱伊主佟國忠係原任江西巡撫佟國勳之弟在四川平茶司楊土官家入贅多年差來投帖請安等語敕協查佟國勳係旗員伊弟國忠不應在土司入贅且從未謀面相應連人并名帖移解查訊等因准此卑職隨訊據劉獻祥供主子年六十歲係正藍旗人原任雲南布政司後陞江西巡撫佟國勳之弟只聽得主子說

原在雲南因到四川侯道爺處討帳至重慶府有
四川平茶土司親屬楊昌朗在重慶住主子就在
楊家入贅後來搬在平茶司客寨住如今約有二
十多年今年正月初八日主子說永綏協張副將
的姪子在雲南做過協鎮後陞廣西提督向日原
有交往差小的來與張副將請安十五日纔到投
帖等語詳報到臣隨咨會四川督撫查拏佟國
忠務獲審究外事關旗人脫籍潛藏謹將現在咨

查緣由繕摺

奏明謹

奏

旗人入贅土司必有情故獲日嚴審定擬具奏以聞

雍正十三年四月二十四日湖廣總督臣邁柱謹

奏為恭懇

聖恩事竊照容美改土歸流新設府廳州縣等官准部
咨行令揀選熟悉苗疆才守兼優之員具

題補授臣思新闢苗疆設官任職務以得人為要但楚省屬員之中欲與容美新設員缺對品而又才堪勝任者不易多得除襄陽府知府王志遴守謹才練熟悉苗情以之調補新設知府與例相符外其餘因才器使以資治理同知一員請以漢陽縣知縣梁瑛補授通判一員請以長陽縣知縣孟琅補授容美舊司治新設知州請以

題署安陸府通判毛峻德補授新設州同請以應城

縣崎山鎮卓異巡檢繆鵬起補授新設州判請以
卓異陞補巴東縣野三關巡檢王都補授五峰司
新設知縣請以黃陂縣縣丞張曾穀補授新設縣
丞請以漢陽縣蔡店巡檢龔之鑽補授以上梁瑛
等七員均非對品應陞之員但俱係努力辦事才
具練達且有現在容美分任經理諸事妥協土人
羣相感孚如蒙

聖恩俞允破格擢用則各員亦自奮勉而新闢苗疆可

收實效矣除恭疏具

題外相應奏懇

皇上睿鑒施行謹

奏

具題到日酌定有旨

同日又

奏前據辰州府分防永綏同知梁璨詳報旗員佟國
勳之弟佟國忠漏脫旗籍在四川平茶土司之親

屬楊昌朗家贅居多年經臣咨行拏解一面具摺
奏

聞今於本年四月初八日據該同知詳稱差役前往平
茶地方拏獲佟國忠到案訊據國忠供稱係正藍
旗漢軍祖名養玉父名佟高年原任江西巡撫佟
國勳是五服以外的族兄小的生長江南自幼在
外生理本旗原無名目是康熙四十四年入贅楊
昌朗家竝未生育子女劉獻祥原是廣東人投身

二十多年不是用價買的他要到永綏營喫糧小的曾吩咐他這張副將若在雲南做過千總他是我當日拈香的弟兄你就寫手本去請安不想劉獻祥到永綏營不問明白竟寫小的名帖去請安就被拏住移解的等情詳報前來除批飭請咨解部外所有拏獲脫籍旗人佟國忠緣由理合奏

聞謹

奏

旗人之與土司原屬兩不相涉一旦聯締婚媾托足多年豈無故而然歟應行徹底研究毋得疎畧

雍正十三年閏四月十三日湖廣總督臣邁柱謹
奏為恭報二麥豐收分數米糧價值仰慰

聖懷事竊照楚省今年雨水調勻二麥菜豆俱獲豐收
茲據湖北布政使李世倬湖南布政使張璨各將
收成分數及米糧價值分晰開報前來臣查湖北
之武昌漢陽黃州荊州安陸德安襄陽鄖陽等八

府併直隸歸州一州各所屬二麥收成俱有八九

十分不等其米價每石自六錢五分起至一兩不

等湖南之長沙衡州永州寶慶岳州常德辰州永

順等八府併郴州靖州澧州桂陽等四州各所屬

二麥收成俱有八九十分不等其米價每石自七

錢三四分起至一兩不等

臣謹另繕清單恭呈

御覽外伏查楚省從前不多種麥百姓不知二麥之利

與稻穀無二近年蒙

皇上屢頒

諭旨各地方官俱能欽遵多方勸諭廣為種麥野無遺
土民多益藏目下雨水充足禾苗青秀閭閻俱有
含哺鼓腹之樂理合一併具

奏伏乞

睿鑒謹

奏

覽全楚麥收分數朕懷深慰

同日又

奏竊照黔苗滋事逼近楚邊臣聞信即密札提臣派定官兵豫備聽調其黔楚聯界地方調撥弁兵堵禦前經具摺

奏明嗣於閏四月十一日據貴州貴東道署鎮遠遊擊知府知縣守備聯銜詳為請兵援勦事內稱本年三月內有姦苗從古州暗布妖言誘惑新彊頑苗該地文武正查緝間姦苗糾衆窺犯古州之王

嶺汎已被官兵擊敗又奔至清江犯台拱之番抬
汎復被官兵擊敗乃聚集於台拱清江交界之雞
擺尾經督撫提遣發官兵勦除逆苗竟敢阻絕清
江擁衆迎敵至今相持未解四月間逸入邛水邊
方勾串熟苗夥同響應遂至肆行無忌將鎮遠府
屬邛水司及鎮遠縣所屬八洞等處民村漸次焚
劫本省提督不日親統大兵臨鎮但兵從上游檄
調勢難尅期雲集又聞清平縣屬之凱里等處熟

苗亦相附和黃平州屬附近重安之天堂寨亦被
焚燒郵站大路復有阻滯現在鎮遠境內騷擾者
東則攻圍瓦寨已近楚省邊疆南則拒敵塘頭更
逼黔南門戶而且勝秉及舊施秉縣亦日與逆苗
對敵若非上下兩路大兵會勦恐難滅此朝食用
敢詳請迅發精兵數千赴黔會勦仍請先撥辰沅
鎮守官兵數百直趨瓦寨救援又上年楚省協濟
米萬餘石皆運貯清江今被逆苗阻隔不能轉輸

竝懇分檄湖南將奉撥協黔米石星飛輓運鎮遠
以資兵食等因呈詳到臣臣隨即飛咨湖南撫臣

提臣就近酌遣官兵運送米石均無刻遲旋准提
臣董芳咨稱閏四月初三日准貴東道咨稱請兵
援勦即於本標五營內挑選壯兵六百名委右營
遊擊韋國英管領限本月初五日由水路起程星
赴黔省瓦寨地方救援去訖又准署撫臣鍾保咨
稱即於沅州倉內碾米四千石淑浦縣倉內碾米

一千石共五千石委員運送直至鎮遠以應急需
等因均屬辦理妥協臣思鄰封有警理宜應援兵
貴神速尤當豫備今逆苗勢熾甚是猖獗誠恐需
兵數多除湖南附近黔苗之營汎不便派撥外其
餘撫提各協營派備三千名如不敷用臣現於湖
北各標鎮協營密派二千名聽候黔省調用一切
軍行應用之物俱經整備俟有咨調文到再為撥
往至楚省與貴州所屬天柱錦屏開泰玉屏等縣

交界地方現撥鎮筵鎮辰沅靖三協暨綏寧武岡
二營弁兵前往協防悉皆嚴密苗民安堵無事其
有鎮遠清溪玉屏百姓來至楚屬沅州一帶躲避
者又黎平錦屏開泰天柱各居民有搬至楚屬靖
州通道一路躲避者臣俱行令各該地方官查造
戶口清冊內有貧難者散給口糧加意安插撫恤
俟寧靜之日給以路費移回原籍不致失所所有
楚省遣兵及豫備聽調之處理合奏

聞伏祈

睿鑒謹

奏

覽派遣備辦各事宜俱屬妥協楚黔接界動關軍機慎
為之不可輕視

雍正十三年五月二十二日湖廣總督臣邁柱謹
奏雍正十三年五月十八日接准大學士鄂爾泰張
廷玉字寄內開雍正十三年五月初四日奉

上諭台拱逆苗不法寧可多備楚省再撥兵二千名陸

續前進協力嚴勦以除兇逆等因欽此臣思湖南各

標鎮協營撥發堵禦援勦并護運米石共用官兵

四千餘員名其餘有本處汛防之責不便抽調隨

將湖北豫備兵丁二千名委叅將遊擊四員每員

帶領五百名飛飭起程由常德陸續前進又因北

南官兵赴黔援勦有五千餘員名必得總兵官大

員前往鎮遠節制方為妥協查襄陽鎮臣焦應林

年力強壯該鎮亦豫稟情願統師效力臣委令該鎮赴鎮遠總統北南官兵聽貴州提臣哈元生調度俟各營報到官兵起程日期另疏

題報外所有再撥湖北官兵赴黔協勦之處合先具摺

奏明謹

奏

覽奏已悉黔事尚在未竣當再行預派以備調遣

雍正十三年六月二十四日湖廣總督臣邁柱謹

奏竊照楚省今年閏四月以前雨水調勻二麥豐收

自正月初三日徧霑雨澤之後各屬間有得雨不

能周遍省城兼旬不雨臣齋心修省於二十五日

起設壇祈禱至六月初十十四十八等日北南兩

湖俱經得雨田禾滋潤米價每石一兩上下不等

今年伏汎長水甚小又隨長隨消各屬堤塍穩固

早稻業已收穫聞低窪湖田十分豐熟高處稍歉

容臣確查收成分數另報外合先具摺奏

聞伏祈

睿鑒謹

奏

頃聞楚省缺雨殊甚所奏情形與朕所聞迥不相符

雍正十三年七月十五日湖廣總督臣邁柱謹

奏為恭報早稻收成分數米糧價值仰慰

湖北民食所重在米不以二麥為事

聖懷事竊照本年楚省二麥豐收臣已具摺奏

聞也今早稻俱已收穫經臣行據湖北布政使李世倬湖

南布政使張燦將收成分數及米糧價值開報前來臣查湖北武昌漢陽黃州安陸德安荊州襄陽鄖陽等八府歸州一州各所屬收成俱有十分九分八分七分六分不等米價每石自七錢七分起至一兩一錢不等湖南長沙衡州永州寶慶岳州常德辰州永順等八府澧州桂楊郴州靖州等四州各所屬收成俱有十分九分八分七分不等米

價每石自七錢一二分至一兩不等除將收成分數米糧價值另摺臚列恭呈

御覽外理合繕摺奏

聞上慰

聖懷伏祈

睿鑒謹

奏

此奏不實悉屬粉飾之詞朕付之不覽

硃批諭旨卷二百十三之六



總校官庶吉士臣侍朝

校對官編修臣莫瞻菴

膳錄監生臣張槎